

– Ֆարհատ, գիտե՞ս ինչ կայ. ես չեի ցանկանայ, որ իմ ծանօթներից մեկը տեսներ ինձ, բայց դեպքը այնպես բերեց, որ մենք հանդիպեցինք մեկմեկու. ես յուսով եմ, որ մեր հանդիպումը կը մնայ որպես գաղտնիք:

– Ես չի՞ պիտի գիտենամ պատճառը:

– Այժմ ոչ. յետոյ ինքդ կհասկանաս... քանի օրից յետո...

– Ես Չաքարիայի նման մունջ կը մնամ, երբ այդ ցանկանում ես դու:

– Հա, այդպես, ինձ հարկաւոր է առժամանակ ծածուկ մնալ...

Նա կրկին խորասուզեցաւ իր մտածութիւնների մէջ:

Կարօյի զգուշացուցիչ պատոեղը չափազանց զարմացրեց ինձ: Մի մարդ, որ ամբողջ տասն եւ երկու տարի հեռացել էր հայրենի երկրից, որին ամենքը կորած էին համարում, որը այժմ մի հրաշքով կրկին յայտնուել էր, ցանկանում էր դարձեալ ծածուկ մնալ, ցանկանում էր իր ծանօթներին, բարեկամներին չհանդիպել: Ինչ էր գաղտնիքը – այս հարցը սկսեց տանջել իմ միտքը:

Անցնելով աւելի քան կէս մղոն ճանապարհ, անապատի միջով, մենք հասանք այն տեղը, ուր անյիշելի ժամանակներից մնացել էին հին աւերակներ, որոնց մասին տատս պատմել էր ինձ այնքան շատ զարմանալի զրոյցներ: Փլատակների մէջ մի միևարեթ միայն մնացել էր ամբողջ եւ լուսնեակի լուսով նա աւելի գեղեցիկ էր, քան թէ ցերեկով: Նրա կապտագոյն մոզայիկները այժմ փայլում էին կախարդիչ հրապոյրներով: Ինձ երեւում էր, որ այդ միևարեթը, որպէս մի վիթխարի հսկայ, փառաւոր կերպով վեր բարձրացած փլատակների միջից, լի ոխակալութեամբ, սպառնում էր ժամանակներին – «դուք ոչնչացրիք իմ շրջակայքում բոլորը, ինչ որ ստեղծել էր արհեստը եւ ճարտարութիւնը, բայց ես կը մնամ, դեռ երկար կը մնամ եւ կը պատերազմեմ ձեզ հետ»...

Բայց ոչ, այսպիսի մտածութիւններ չէին զբաղեցնում իմ միտքը... այլ այն ըոպեում, երբ հասանք աւերակների մօտ, ինձ տիրեց մի սարսափելի խռովութիւն: Երեխայութիւնից լսածներս այն հին, խորհրդաւոր աւերակների մասին, մինչ այն աստիճան գրգռել էին իմ սնահաւատութիւնը, որ ես լոյս-ցերեկով երբեք չէի համարձակւում մօտենալ նրանց. իսկ ա՛յժմ, գիշերո՞ւմ, – դա զարհուրելի յանդգնութիւն էր: Այդ պատճառով ես իմ մտքում խիստ դժգոհ մնացի Կարօյից, երբ նկատեցի, որ ինձ այն տեղ է տանում:

Մօտենալով միևարեթին, Կարօն շոացրեց: Միևարեթի միջից պատասխանեցին նոյն զիլ եւ ձգական ձայնով: Ես խորին անվստահութեամբ ոտք կոխեցի նրա շեմքի վրայ, երբ Կարօն հրաւիրեց ներս մտնել: